



Komunikadu Imprensa
22 Novembru 2023

Membru comunidade no estrutura suku Lalisuc preokupa ho prosesu justisa formál ne'ebé la'ó kle'ur liu

Iha 10 Novembru 2023, JSMP realiza treinamentu ba membru konsellu suku no membru comunidade iha suku Lalisuc, Postu Administrativu Pante Makasár, Rejiaun Administrativa Espesiál Oekusi-Ambeno (RAEOA). Matéria treinamentu nian kona-ba demokrasia, kna'ar órgaun soberania, partisipasaun públiku iha prosesu halo lei no asesu ba justisa formál iha Timor-Leste.

Objetivu husi treinamentu ne'e mak atu hasa'e koñesimentu membru konsellu suku no comunidade sira, inklui partikularmente ema ho defisiénsia, kona-ba demokrásia, kna'ar órgaun soberania sira iha prosesu halo lei no direitu asesu ba justisa formál iha Timor-Leste.

“JSMP espera katak membru konsellu suku no comunidade sira ne'ebé partisipa iha treinamentu ne'e bele habelar tutan tan informasaun ne'ebé hetan ba iha membru comunidade sira ne'ebé la hola fatin iha treinamentu ne'e. Nune'e, membru comunidade sira seluk bele mós iha koñesimentu ba informasaun relevante no partisipa ativamente prosesu dezenvolvimentu nasionál, liuliu iha setór polítika-lejizlativa no justisa,” dehan Diretora Ezekutiva JSMP, Sra. Ana Paula Marçal.

Durante treinamentu partisipante sira hato'o sira nia preokupasaun balun kona-ba prosesu justisa formál ne'ebé la'ó kle'ur iha tribunál, demokrásia ne'ebé la refleta ona kultura Timor-Leste, uza direitu no liberdade hodi kontra fali ema seluk nia direitu, direitu sira kona-ba kazamentu inklui prosedimentu sira atu resolve kazu violénsia doméstika tuir lei formál Timor-Leste nian.

JSMP iha nia resposta ba pergunta sira ne'e, haktuir katak, iha prosesu justisa formál problema ne'ebé agora dadaun iha setór justisa hasoru mak menus rekursu umanu. Ida ne'e mak dala ruma fó impaktu ba prosesu kazu sira tarde. Relasiona ho kestaun ne'e, karik durante prosesu mak iha indikasaun ruma la tuir prosedimentu legál sira iha Lei Prosesual Penal no Sivil. bele hato'o keixa.

Entretantu kona-ba kestaun demokrasia no uza direitu no liberdade sira, iha estadu-direitu demokrátiku buat hothotu regula ho lei, nune'e, bainhira atu ezerse direitu no liberdade ne'e tenki tuir lei sira ne'ebé vigora iha Timor-Leste no respeita mós ema seluk seluk nia direitu no liberdade. Bainhira uza direitu no liberdade sira ne'e hodi halakon ema seluk nia direitu, ne'e lei mak sei eduka no kondena ka fó kastigu.

Kestaun resolve kazu violénsia doméstika, Timor-Leste iha ona Lei Nú.7/2010 kona-ba Lei Kontra Violénsia Doméstika. Lei ne'e konsidera ona katak violénsia doméstika nu'udar aktu krime públiku ida ne'ebé kuandu akontese ema seluk mós bele hato'o keixa no nia prosedimentu krime sira sei prosesu tuir dalan justisa formál nian.

Alende ne'e, kestaun kazamentu regula ona iha Lei Sivil Timor-Leste nian. Provizaun Artigu 1475 regula kona-ba kazamentu sira ne'ebé konsidera legál mak hanesan kazamentu tuir relijiaun Katóliku, rejistu sivil (notariadu) no barlakiadu. Rekezitu tolu ne'e hosi ida priense ona bele konsidera kazamentu ne'e legál tuir lei.

Iha intervensaun xefi suku Sr. Hermelindo, haktuir katak informasaun ne'ebé JSMP fahe ne'e foin mak akontese iha suku Lalisuc no informasaun ne'e importante ba comunidade no estrutura suku sira atu rona no fahe tutan iha comunidade sira ne'ebé la partisipa iha treinamentu ida ne'e.

Xefe suku mós apresisa ho JSMP nia prezensa atu fahe informasaun relevante no importante sira ne'e ba iha membru comunidade no estrutura suku.

Partisipante sira kompostu husi membru estrutura suku no comunidade husi aldeia 4 ho total partisipante hamutuk ema na'in 33, kompostu husi feto 19 no mane 14.

Treinamentu ne'e realiza tanba hetan apoiu finanseiru hosi Governu RDTL liuhosi Fundu Apoiu Siedade Sivil ka SASCAS, Gabinete Vise-Primeiru Ministru.

Atu hetan informasaun liutan favór kontaktu:

Ana Paula Marçal
Diretóra Ezekutiva JSMP
Diresaun e-mail: ana@jsmp.tl
info@jsmp.tl
Website: <http://jsmp.tl>